

Давулгъа чокъмар ярашыр.

БАГЪЧАСАРАЙ

№ 15 (92)

КЪУРУДЖЫЛЫКЪ ПЛАН БОЮНДЖА КЕТМЕКТЕ



Саифемиз энди бильдиргенине коре, Багъчасарайнынъ Джейхан мааллесинде «Къырым Джумхуриетининъ ве Акъяр шеэрининъ 2020 сенесине къадар ичтимаий-икътисадий инкышафы» федераль макъсадий программасы черчevesинде «Халкъара бирлик теминлеви» ёнелиши боюнджа 260 ерлик бала багъчасы ве Мира сокъагъында 600 ерлик мектеп къурулаят. Кеченлерде къуруджылыкъ мейданыны Багъчасарай район мемуриети миллетлерара мунасебетлери боюнджа болюгининъ мудри Эльдар Меметов ве шу болюкнинъ баш мутехассысы Эльвина Камилова зиярет эттилер. Бала багъчасынынъ магъазы энди азыр. Шимдики куньде биринджи къатта диреклер ортыльмекте. Мек-

теп къурулаяткъан ерде исе котлован къазылды.

Багъчасарай районнда «Сюйрен» демирёл станциясы янында сюрдюник къурбанларынынъ хатырасына тикленеяткъан мемориаль комплексининъ мейданы да бакъып чыкъылды. Къуруджылыкъ мейданында иш план боюнджа кетмекте. Энди мемуриет ве музей биналарынынъ темели къоюлды. Бугуньки куньде джамеи ве кильсе биналарынынъ каркаслары япылмакъта. Бундан да гъайры мемуриет бинанынъ огюнде абаданлаштырув ишлери кетмекте. Къысмен электрик агълары да кечирильди.

ФОТОРЕСИМЛЕРДЕ: къуруджылыкъ мейданындан левхалар.



САБРИЕ ЭРЕДЖЕПОВАНЫНЪ 105 ЙЫЛЛЫГЪЫНА

САНАДА КЕЧКЕН ОМЮР



САБРИЕ
ЭРЕДЖЕПОВА

Къырымда ве Озбекистанда нам къазангъан артист, севимли йырджымыз Сабрие Эреджепова санаат алейминде ярыкъ, сёнмез бир йылдыз олып къалды. Йырджынынъ гурь, кучлю ве озгюн сеси, юрек араретинен иджра этильген йырлары бугуньде озь этрафында динълейджилерни топлай, оларнынъ юрегине ве ангына барып токъуна.

Эфсеневи йырджымыз Сабрие Эреджепова 1912 сенеси июль 12-де Багъчасарай шеэринде дюньягъа кельди. Бабасы Керим Джемиль оджа олып чалышты, анасы исе эв бикеси эди. Сабрие мектепни битирген сонъ, 1926 сенеси окъувны девам этмек макъсадыннен Акъмесджитке кетти. 1932 сенесинден башлап халкъ йырларыны иджра этти. 1935 сенеси Ялта киностудиясында чыкъарылгъан «Запорожец за Дунаем» бедий фильмде кадр артында йырларны иджра этти. 1939 сенеси Сабрие Эреджепова Москвада отъкерильген Биринджи Бутюсоюз эстрада конкурсында иштирак этти ве «Истидатлы яш йырджы» дипломынен тагъдирленди. 1940 сенеси Къырымда эстрада концертлер бюросы мейдангъа кетириле. Бюро ярдымынен ярымаданынъ чешит шеэрлеринде концертлер тешиклятландырылды. Бу концертлерде Сабрие Эреджепова да иштирак этти. Айны шу сене С. Эреджеповагъа Къырымда нам къазангъан артист унваны берильди. 1941 сенеси дженк башлангъан сонъ да бюро тарафындан тешиклятландырылгъан концертлер токътатылмады, артистлер энди госпиталлерде, казармаларда, арбий къысымларда чыкъыш яптылар. Сабрие Эреджепова да оларнынъ сырала-

рында эди. 1944 сенеси сюрдюник вакъытында С. Эреджепова Ленинабад шеэринде тюше, къуруджылыкъта бригадир олып чалыша.

1950 сенеси оны совет халкъынынъ душманы деп, 7 йыл лагерлерге ёллап, джезалайлар. Апсхане оны 1957 сенесине къадар аилден, санадан, дюньядан айыра. 11 йылдан сонъ С. Эреджеповадан ресми оларакъ къабаат толусынен алып ташланыла.

1957 сенеси Сабрие Эреджепова Ташкентте тешикль олунгъан «Хайтарма» къырымтатар ансамблине теклиф этиле. 1966 сенеси онгъа Озбекистанда нам къазангъан артист унваны берильди. 1973 сенеси Сабрие ханым 60 яшыны толдургъаны мунасебетинен онынъ юбилей агъшамы олып кетти. Шу куню С. Эреджепова сонъки кере санагъа чыкъты, сонъки кере сейирджилерине теменна этти. Сейирджилер исе онгъа сонъки кере эльчырптылар. О, Ватаны Къырымгъа къайтып оламады. 18 сентябрь куню 1977 сенеси Сабрие Эреджепова Ташкентте вефат этти.

Халкъынынъ къальбинде, юрегинде, хатиресинде исе Сабрие Эреджепова эдебий къалды.

СЕН ЙЫРЛАГЪАНДА
Бульбуллерден сени ич де
Тенъештирип оламам.
Чонки бульбуль эзгилери
Бир-бирине бенъзейлер.
Сенинъ джошкъун, ош аэнкли
Йырларынъны эр заман
Динълегенлер, омюр билля
Динълеп кене безмейлер.
Бол табиаат алеймини
Яраштырса бульбуллер,
Сенсинъ рухий къуванч берген
Эр куньки гонълюмизге.
Бульбуль олса табиаатнынъ
Бахшышы кенъ алемге,
Талий сени багъышлагъан
Бахтымызчюн бизлерге.
ЧЕРКЕЗ-АЛИ.

ОКЪУЙЫДЖЫЛАРЫМЫЗНЫНЪ ИДЖАДЫНДАН

ТУВГЪАН УЛЬКЕМ

Тувгъан ульке, азиз Къырым.
Дагълар, денъиз, орман, чёллер.
Сынъырсыздыр Ватаным.

Севги, уют сеннен багълы.
Къырым сенинъ де Ватанынъ.
Къальбинъ, юрекнен сев оны.
Тувгъан улькенъ, догъмуш эвинъ.
Севги, уютнен сев оны.

Тылсымлыдыр тарихы. Абиделери – дестан.

Яш алимлерге ача бу ер
япыкъ сатырларын.
Сен - бу ернинъ саибсинъ.
Сев ве сакъла топрагъынынъ.
Ватанынынъ огълу олсанъ,
Ачар сангъа о къучагъын.

Нияра АБЛЯЗОВА.

СЕВИМЛИ МЕКТЕБИМЕ

Мектеп чагъым, алтын деврим.
Кельди-кетти. Дуймай къалдым.
Дерслик, дефтер, къалем, джедвель,
Сильгич - эр кунь мында меннен.
Оджа мангъа герс анълатыр.
Бильги, тертип шай ашлатыр.

Бу бинадан бугунь кетем
Сербест ёлгъа, яшайшкъа
Лякин билем, шу кунь келир –
Балам иле

Мектеп чагъым къайтып келир.

Шефикъа АБЛЯЗОВА.

Къырымтатар халкъынынъ хатыра
ве танылгъан куньлерининъ такъвими

ИЮЛЬ

12 – языджы Шамиль Алядиннинъ 105
йыллыгъы (1912-1996).

12 – йырджы, Къырым мухтар советлер
джумхуриетинде ве Озбекистанда нам
къазангъан артист Сабрие Эреджепова-
нынъ 105 йыллыгъы (1912-1977).

21 – 100 йыл эвельси (1917) Къазанда
Мусульманларнынъ умумрусие экинджи
съезди чалышып башлады.